

畿輔通志卷三

帝制紀三

詔諭三

雍正十三年十一月

諭直隸營田乃

皇考教稼養民之至意但事關地方必須本地方有司實力奉行始得裨益朕意將營田觀察使撤回專交地方官管理其如何派遣府大員督率稽查之處著總督李衛妥議具奏

乾隆元年五月

諭朕聞宣化府屬之懷來縣僻處山邊向有保字號墾荒地七十一頃徵糧八百六十餘石始於前明時防禦邊患募兵戍守卽以近山地土令其耕種每軍士一名種地五十畝者准作半年糧六石

種地一頃者准作一年糧十二石彼時應募屯軍不過圖免本身雜差遂不計地之多寡荒熟今历年既久其間有地荒而糧存者有地少而糧多者官民不免賠累之苦且該縣徵糧科則上地每畝徵糧五升六合中地三升六合獨此項地土則每畝徵糧至一斗二升民力尤難輸納著該督委員確查將山地不可耕種無所出者共計若干奏聞豁免其可以耕種之地則按照本縣科則分別定議俾邊塞黎民永沾實惠

乾隆元年九月

諭王大臣等據辦理

泰陵事務恆親王宏暉內大臣戶部尚書海望奏稱

世宗憲皇帝梓宮安奉

泰陵地宮請照

景陵之例安設龍山石其隨入地宮之分位並萬年後應留之分位相應請

旨等語朕敬將萬年應留分位之處奏請

皇太后懿旨奉

皇太后懿旨

世宗憲皇帝梓宮奉安地宮之後以永遠肅靜爲是若將來復行開動揆以尊卑之義於心實有未安況有我朝

昭西陵

孝東陵成憲可遵

泰陵地宮不必豫留分位朕伏承

懿旨仰見

皇太后坤德恭謹

聖慮周詳自當恪敬遵奉倣照

昭西陵

孝東陵之例另卜萬年吉壤候朕詳酌再降諭旨至

皇考梓宮奉安地宮時著照例安設龍山石其隨入地宮之

皇妣孝敬憲皇后梓宮應居左稍後

敦肅皇貴妃金棺應居右比

孝敬憲皇后梓宮稍後

乾隆元年十月

諭朕聞永平府屬州縣凡徵收錢糧率皆以錢作銀每銀一兩連扣耗銀一錢五分共折交制錢千一百五十文見今該處錢價昂貴民間交納錢文比之完納銀兩爲費較重朕思民間完納錢糧銀數在一錢以下者向例銀錢聽其並用原以便民若數在一錢以

上又值錢價昂貴之時亦令交錢轉致多費是便民而適以累民殊未妥協著直隸總督飭行各屬民間完納錢糧在一錢以上者不必勒令交錢在一錢以下者仍照舊例銀錢聽其自便

乾隆二年七月

諭曰自古致治以養民爲本而養民之道必使興利防患水旱無虞方能蓋藏充裕緩急有資是以川澤陂塘溝渠隄岸凡有關於農事預籌畫於平時斯蓄洩得宜潦則有疏導之方旱則資灌溉之利非可委之天時豐歉之適然而以臨時賑恤爲可塞責朕御極以來宵旰憂勤惟小民之依是咨是詢前後諭旨諄復再三但化導自在有司而督率則由大吏近日直省督撫惟甘肅巡撫德沛到任後卽以興水利裕倉儲爲請署西安巡撫崔紀亦有勸民鑿井灌田之奏尙能留心民食知本計之所當先其餘能盡心於吏

治官方命盜錢糧諸事者尙不乏人而於民生衣食本源未能切實講求地方守令亦惟刑名錢糧自顧考成至以愛養百姓爲心留意於稼穡桑麻如古循吏所爲者蓋不可得卽如直隸今年夏初少雨則以熯旱爲憂及連雨數日尙不甚大而永定河遂有漲溢之患決口四十餘處低窪之地多被水淹雖因山水驟發然水性就下其經行之地自有定所設預爲溝渠以洩之爲塘堰以瀦之自可以分殺水勢不致匯爲洪流衝突漫淹如此之甚是皆平日不能預先籌畫所致也各該督撫有司務體朕痾瘝乃身之意刻刻以民生利賴爲先圖一切水旱事宜悉心講究應行修舉者卽行修舉或勸導百姓自爲修理如工程重大應動用帑項者卽行奏聞妥協辦理俾旱潦不侵倉箱有慶以副朕惠愛黎元至意

乾隆三年二月

諭直隸宣化府屬懷來保安二州縣採辦楊木長柴供

郊壇

宗廟焚帛之用向無開銷之例俱係兩縣捐貲繼因添用柴薪分派宣屬他縣協辦相沿已久朕思州縣公捐易啟借端科派貽累小民之弊不可不防其漸著從乾隆三年爲始將每歲需用楊木長薪照辦解之數動用正項造入地丁冊內報銷令出產之懷來縣承辦以專責成

乾隆三年五月

諭王大臣等近看李衛辦事甚屬麤率不似從前昨已降旨訓諭今覽奏雨水麥收情形之摺其中錯謬之處甚多如奏稱連日忽陰忽雨見在入土尺許尙未透足等語天下豈有得雨尺許而尙未透足之理明係雨澤短少而爲捏飾之奏觀此則從前所報未至

尺許者竟屬全無雨澤矣又稱麥收已畢市價平減誠恐麥賤傷農等語自古穀賤傷農之說原指屢豐之後而言然亦非常理況直隸地方舊歲旣屬歉收今年麥秋長短不一以此日之情形而爲麥賤傷農之說豈不背謬乎又伊所開米價單內保定府稻米每一倉石價銀二兩六錢至二兩七錢五分稱爲價中大名府稻米每一倉石價銀一兩七錢五分至二兩一錢四分稱爲價賤豈有如此米價尙得爲中尙得爲賤乎朕念切民依固不肯以年歲歉薄委咎於督撫然亦豈可置之不問蓋督撫身膺民社之職凡遇雨暘年穀最緊要之事當倍極周詳慎重庶能上感

天和下紓民困今陳奏於朕前者尙且如此則其辦理措施豈能妥協大出朕意料之外可傳旨訓飭之

乾隆三年九月

諭今年畿輔地方收成有歉薄之處而口外年穀順成頗稱豐稔昨已降旨准商人出口往來販運以資接濟今思京城米價現在不能平減來春青黃不接之時恐益加騰貴著派出戶部司員赫赫那爾善內務府官員王常保王慎德於張家口古北口二處各二員攜帶內庫帑銀前往會同地方官將米豆雜糧等項照時價採買運送來京交八旗米局平糶使都門兵民得資外來之米以供饗飧而口外有餘之糧亦不致耗費於燒鍋等項無用之地實屬兩有裨益其應齎銀兩若干並作何輓運之法著該部速行詳悉妥議具奏

乾隆三年九月

諭畿輔地方今歲歉收米價昂貴朕深爲廛念向來口外米穀不令進口留爲彼地民食之需今年口外收成頗豐而內地不足自當

酌量變通以資接濟如有出口糴糧及販運進口者聽其往來不必禁止管口官弁但行稽查違禁貨物毋得苛索如此則內地民人多得米穀可無艱食之虞而口外餘糧亦獲貿易之利該部可遵諭速行

乾隆四年 月

諭戶部會同八旗議奏將公產地價贖回民典旗地等語我朝定鼎之初將近京地畝圈給旗人在當日爲八旗生計有不得不然之勢其時旗人所得地畝原足以資養贍嗣因生齒日繁恆產漸少又或因事急需將地畝漸次典與民間爲業閱年久遠輾轉相授已成民產今欲將從前典出旗地陸續贖回必須於民全無擾累辦理始爲妥協再此項地畝官員內尙須扣俸認買貧乏兵丁食餉有限無從措價勢必至盡歸富戶富戶卽肯周濟親族亦豈能

多爲分給則贖地一事恐未必於貧乏旗人有益可將此旨行交直隸總督妥議

乾隆十年 月

諭今年直隸宣化府所屬被旱歉收恐附近州縣所貯米穀未必處處充裕可以分撥濟用來歲青黃不接之時或致米糧不敷此時應當計及著撥通倉米五萬石聽該督酌量分發缺米州縣存貯備用

乾隆十一年 月

諭上年宣化府所屬被旱歉收今春雨澤又復稀少著將通倉粟米撥運十萬石分發所屬州縣以備撥給倘今歲秋成豐稔卽將此項補實倉儲其如何陸續輓運著倉場侍郎會同該督妥議辦理

乾隆十一年 月

諭從前朕巡幸直隸地方見城垣多有殘缺皆因不能隨時堵築以致出入踐踏踰越成路因令大學士等寄諭各督撫令其督率有司留心整飭嗣據巡撫碩色奏請分別工程一千兩以上者俟以工代賑之年動項興修一千兩以內者令該州縣分年修補除土方小工酌用民力外其餘卽於工費項下支修朕將依摺令各督撫閱看俾其仿照辦理但須善爲經紀勿致累民而各督撫中遂有因此奏請開捐土方並將各官養廉合力捐修者或經批示或經議駁俱未准行今鄂彌達復奏摺內又稱按田起夫誠恐佔田之戶必派之佃田之家不若暫借稅銀生息以備修補等語此奏甚屬錯誤全不知朕本意矣蓋城垣爲國家保障其責全在地方官員其所以酌用民力者蓋因各處城垣偶有坍塌地方官並不查禁任民踐踏甚且附近居民竟將城磚竊取以供私用是以令

於農隙之際酌用本地方民夫修築使民知城垣之設原以衛民已身曾用力於其間則遇有坍塌自然護惜不肯任意踐踏且隨時修補亦易爲力此上下相維之義並非令其按田起夫竟成賦額之外增一力役之徵也如鄂彌達摺內所稱者恐各省督撫亦錯會朕旨或致辦理未善致有累民之處用是特頒此旨曉諭各省督撫知之

乾隆十六年五月

諭方觀承奏稱宜化府州縣目下糧價昂貴缸戶率皆圖利私燒罔知撙節現飭地方官封禁缸房暫免缸稅等語開燒耗費糧石遇價貴之年量爲節制原屬應辦之事至免稅封缸概行飭禁則恐稅雖免而缸終不封徒使缸戶潛自開缸居奇獲利奸胥猾吏更復乘機需索以飽囊橐而于民間食用市肆糧價實無裨益卽如

康熙年間之禁烟免稅而烟迄今不能禁天下事有言之近理而行之了無實際皆此類也朕思向來缸戶給領牙帖本屬有數可稽不但糧貴之年卽屢豐大有亦應明定缸戶之數不令日加則蓋藏日裕矣其偶遇歉收於額設缸戶每日所燒糧石亦酌以定數此外不得任意糜耗卽就成法之中自可寓稽查撙節之道矣朕辦理庶務惟求實際不事虛名著傳諭督臣方觀承此事令其另籌

乾隆十七年 月

諭巡視通州漕務向例止差科道一人專司催督漕運而倉場事務則概不與聞但通倉積弊甚多現委大臣盤驗著增差科道四人前往巡視漕務凡收兌新漕支發倉米皆著就近稽查至在京各倉雖經委有專員亦著一同留心稽察務期諸弊肅清以副委任

乾隆二十三年 月

諭各省糧船抵通除交倉全完外所餘食米俱由坐糧廳衙門給與照票俟回空時於天津一帶沿途售賣而通州水次則例應嚴禁私糶蓋因通倉爲兌米之地恐夾雜影射致滋弊端若漕米均已不致挂欠其餘剩食米自可聽其在通出糶不必過爲苛禁在各運丁等卽可免領照驗票之煩而通州米石充裕於京師民食亦屬有益

乾隆二十四年三月

諭軍機大臣等向例糧艘抵津或遇水淺起剝糧石需用民船是以臨期酌量將回空貨船雇覓預備剝運近聞楊村一帶竟有將路過載貨船隻封禁者客商貨物中途搬卸以致轉運維艱殊非通商便民之道現在糧艘抵通爲期尙早卽將來有需剝運待此等

船隻抵灣卸貨後再行雇覓亦未爲遲著傳諭方觀承前往查看如果有此項情節該督卽行禁止並將現在辦理情形詳悉奏聞再楊村添設巡漕御史二員本爲稽查漕船河道起見原係本年新設並非舊例所有若因此而轉滋擾累殊非設官本意其果否有裨漕政並著方觀承據實具奏

乾隆二十四年四月

諭前聞楊村一帶路過客船悉被封禁客商貨物中途搬卸以致轉運維艱該處新設巡漕御史二員本爲稽察漕船河道起見若因此而滋擾累殊非設官本意其楊村駐劄巡漕御史之處著停止

乾隆二十四年四月

諭京師五城現已撥米平糶其安河橋之豐益倉清河之本裕倉所有現存米石並著酌量平糶各派御前侍衛一員帶領駐劄圓明

園參將等會同該倉督妥協辦理庶郊外居民可以就近買食不必遠赴京廠

乾隆二十四年五月

諭軍機大臣等劉綸奏報捕蝗一摺內稱遵化州屬毘連永平地方亦間有萌生之處其地雖非順天所屬事關農田民食現飭通永道明琦協同副將胡大猷前往查勘等語未免存畛域之見劉綸係欽差督捕大員凡遇有蝗蝻之處卽宜就近前往董率員弁盡力搜捕庶地方有司不敢怠玩從事永平地方既有蝻孽萌生自當早爲撲滅以絕根株著傳諭劉綸現在薊州一帶卽可就緒卽速前赴該處督同該道府等查勘撲除務期淨盡以杜他處蔓延正不得以非順天所屬遂意分彼此而自弛其擔也

乾隆二十四年五月